



Här Claude WISELER
Chamberspräsident
LËTZEBUERG

Ministère de l'Agriculture, de l'Alimentation et de la Viticulture	8
Référence : 150/2025	
12 MARS 2025	
A traiter par :	
Copie à :	

Lëtzebuerg, den 11 Mäerz 2025

Här President,

Esou ewéi den Artikel 80 vum Chambersreglement et virgesäit, biede mir lech, dës parlamentaresch Fro un d'Madamm Ministesch fir Landwirtschaft, Ernährung a Wäibau an un den Här Minister fir Ëmwelt, Klima a Biodiversitéit weiderzeleeden:

„An engem rezenten Artikel gouf beriicht, datt d'europäesch Kommissioun Frankräich 500 Milliounen Euro fir d'Förderung vun Hecken innerhalb der Landwirtschaft zur Verfügung stellt. Vill Studie weisen drop hin, dat sougenannt Hecke-Korridoren op de Felder Virdeeler fir d'Biodiversitéit hunn.

Dës Hecke-Korridore fungéieren als Habitat fir wëll Déieren an Insekten, wat wäertvoll Bestëbser fir d'Biodiversitéit sinn. Zousätzlech fungéieren dës och als natierlech Schädlingkontroll, wat virun allem de Gebrauch vu Fungizide limitéiere kéint. Dës Weidere kënnen se och de Waassergehalt reguléieren an d'Buedemqualität verbessern.

An deem Kader wollte mir der Madamm Ministesch fir Landwirtschaft, Ernährung a Wäibau an dem Här Minister fir Ëmwelt, Klima a Biodiversitéit folgend Froe stellen:

- Ass der Madamm Ministesch an dem Här Minister bekannt, wéi vill Kilometer Hecke-Korridoren et hei zu Lëtzebuerg gëtt?
- Gräift Lëtzebuerg och op EU-Gelder zeréck, fir Bauere beim Ausbau vun Hecke-Korridore finanziell z'ënnerstëtzen? Wann nee, wisou net?
- Falls et net genuch Hecke-Korridoren hei zu Lëtzebuerg ginn, sinn d'Madamm Ministesch an den Här Minister bereet, fir dës méi staark ze förderen?“

Mat déiwem Respekt,

Luc EMERING
Deputéierten

André BAULER
Deputéierten



Gemeinsam Äntwert vun der Ministesch fir Landwirtschaft, Ernährung a Wäibau a vum Minister fir Ëmwelt, Klima a Biodiversitéit op d'parlamentaresch Fro n° 2066 vun den éierewäerten Deputéierten Luc Emering an André Bauler

Ass et der Madamm Ministesch an dem Här Minister bekannt, wéi vill Kilometer Heckekorridoren et hei zu Lëtzebuerg gëtt?

Op Basis vum digitaliséierte Parzellereferenzsystem vum Landwirtschaftsministère ka follgend Zuel genannt ginn:

Gesamtlängt Hecken a Bamreien op landwirtschaftlech genotzte Parzellen: 4.118 km

Well d'Ënnerscheidung Hecken / Bamreien net ëmmer evident ass per Loftbildinterpretatioun, kënnen fir béid Kategorië keng gesécherter Donnéeë geliwwert ginn. Et kann een awer soen, dass den ekologesche Wäert, esouwéi d'Funktoun als Korridor vun de Bamreien oft gläichzesetzen ass mat där vun Hecken.

Gräift Lëtzebuerg och op EU-Gelder zeréck, fir Bauere beim Ausbau vun Heckekorridore finanziell z'ënnerstëtzen ? Wann nee, wisou net?

Falls et net genuch Heckekorridoren hei zu Lëtzebuerg ginn, sinn d'Madamm Ministesch an den Här Minister bereet, fir dës méi staark ze fërderen?

Lëtzebuerg stinn net genuch Gelder aus dem EU-Haushalt zur Verfügung, fir all Ziler vun der europäescher gemeinsamer Agrarpolitik ëmzesetzen. Sou gëtt zum Beispill d'Uleeën vun Hecken a Feldgehölzen am Kader vum Biodiversitéitsprogramm (Règlement grand-ducal du 24 juillet 2024 relatif aux aides en faveur de la sauvegarde de la biodiversité en milieu rural) mat réng nationale Gelder iwwert de Budget vum Landwirtschaftsministère finanzéiert. D'Ausschaffung an och d'Ëmsetzung vun dëse Programmer an Zesummenaarbecht mat de Biologesche Statioune gi vum Ministär fir Ëmwelt, Klima a Biodiversitéit finanziell ënnerstëtzt.

Hei ass notamment follgendes virgesinn:

- D'Planzung vun Hecken (an de Schutz an Entretien vun dësen), Programm C_4 Création de haies, bosquets, de brise-vents, de lisières forestières.
- Den Ekologeschen Ënnerhalt vun enger bestehender Heck (Schneiden an Op-de-Stack-setzen), Programm EN_2 an EN_3 Coupe écologique de haies longitudinales (BK17).
- D'Uleeë vu Benjes-Hecken ("Totholz-Hecken") Programm C_1 Création de biotopes de structure et autres structures Extensives - Installation de haies mortes.

Detailer iwwert déi viru kuerzem iwwerschafften Hecken- a Feldgehölzförderung kënnen um Landwirtschaftportal vum Landwirtschaftsministère ënnert follgendem Link nogelies ginn:

<https://agriculture.public.lu/de/beihilfen/biodiversitaetsprogramme/schaffung-oekologische-strukturelemente.html>

Eng ausféierlech Broschür mam Iwwerbléck iwwer d'Primen a Konditiounen vun den aktuelle Biodiversitéitsprogrammer, gouf vun der Naturverwaltung zesummegeallt, an ass um Site vum Ëmweltministère ze fannen:

https://environnement.public.lu/fr/publications/conserv_nature/2024/biodiversitaet-in-der-landwirtschaft.html

Weiderhin gëtt d'Uleeë vu Liewesraim fir seelen Déieren duerch Gemengen a Privatleit iwwert de *Règlement grand-ducal du 30 septembre 2019 concernant les aides pour l'amélioration de l'environnement naturel* substantiell vum Ministär fir Ëmwelt, Klima a Biodiversitéit ënnerstëtzt. Do fällt och d'Planzen, d'Schützen an den ekologeschen Entretien vun Hecken drënner, wa se de Konditiounen vun dem Règlement entsprechen.

De Ministär fir Ëmwelt, Klima a Biodiversitéit ënnerstëtzt och de Label "Heck vun hei". Am Kader vun dëser Initiativ gi gebitts-eenheemesch Heckeplanze produzéiert. Dës Planze sinn optimal un de lëtzebuerger Standuert ugepasst.

Am Nationalen Naturschutzplang (PNPN3) sinn den Erhalt an d'Verbesserung vun den ekologesche Korridoren och als wichteg Ziler festgehal. Dozou gehéieren och den Entretien an d'Nei-Uleeë vun Hecken. Och d'Förderung vu Strukturelementer an der oppener Kulturlandschaft ewéi schon uewe beschriwwen ass en Zil aus dem PNPN3, wat doriwwer eraus och am Kader vun der europäescher Restauratiouns-Regulatioun als Objektiv verankert ass. Duerch dës Zilsetzung kënnen och Planzungen vun Hecken iwwert den Ëmweltfong finanziert ginn, op Terrainen, déi net landwirtschaftlech genotzt ginn. An dem Kader goufen no engem *Appel à projets* säit leschem Joer 6 gréisser Projete vun NGOs, Biologesche Statiounen an der Natur- a Bëscherwaltung, déi sech mat der Schafung vu Strukturen, wéi Hecken- a Bamreien am Offeland beschäftegen, lancéiert.

All dës Programmer an Initiativen gi reng national finanziert.

Lëtzebuerg, den 23. Abrëll 2025

(s.) Martine HANSEN

Ministesch fir Landwirtschaft, Ernährung a Wäibau